

# FORUM ONG TIMOR LESTE THE TIMOR LESTE NGO FORUM



Rua do Mercado Municipal, Díli Timor-Leste / Mobile +670 7723 5698 / [forumong.tl@gmail.com](mailto:forumong.tl@gmail.com) / <https://fongtil.org.tl/>

## KOMUNIKADU IMPRENSA

### “FONGTIL HO NIA MEMBRU ONG SIRA HATO’O APRESIASAUN, PREOKUPASAUN NO REKOMENDASAUN PROSESU BA ORSAMENTU JERAL ESTADU 2025”

FONGTIL nu'udar organizasaun sombriña ba ONG lokál, nasionál no internasionál iha Timor Leste. Agora dadaun ne'e, FONGTIL iha nia membru hamutuk 286 ne'ebé fahe ba ONG lokál/nasionál 255, internasionál 31 ne'ebé eziste iha Timor Leste. FONGTIL mós iha rede ONG ne'ebé halibur hamutuk iha rede sektorál hamutuk 14 ba asuntu sektorál sira hanesan: papél feto, edukasaun, agrikultura, defisiénsia, bee no saneamentu, asuntu rai, direitus umanus, dezastre naturais, analiza orsamentu estadu, auditoria sosiál, transparénsia, ASEAN, OSC CPLP no rede ba saúde.

FONGTIL apresia Ministériu Finansa ne'ebé realiza semináriu Jornada ba Orsamentu Jerál Estadu ba tinan 2025. Semináriu ida ne'e, ajuda tebes Governante, Sosiedade Sivíl, média, akadémiku no públiku atu hatene realidade sósiu ekonómiku Nasaun nian. Apresenta mós faktu no realidade importante barak ne'ebé presiza konsidera iha elaborasaun Polítika Orsamentál sira iha faze sira tuir mai. Husi apresentasaun ida ne'e mós hatudu situasaun finansiamentu públiku ne'ebé maioria Orsamentu Jerál Estadu finansia husi Fundu Petrolíferu, Husi apresentasaun ne'e, ilustra senáriu fiskál sira ne'ebé káلكulu no marka vida util Fundu Petrolíferu nian.

Ministériu Finansa mós apresenta prioridade sira ba tinan 2025 ne'ebé baze iha PEDN no Programa tinan lima IX konstituisional nian. Governu hakarak kontinua atu implementa estratéjia atuál, programa no orsamentál ne'ebé define ona iha dokumentu Nasional sira temi iha leten. Ida ne'ebé, Fongtil hanoin, presiza iha avaliausaun no konsiderasaun fila fali bazeia ba realidade sósiu ekonómiku atuál.

Tuir ami nia observaun durante ne'e, Orsamentu jerál barak liu gasta iha despeza konsumu no infraestrutura sira ne'ebé ladún apropriadu atu resposta ba problema estrutural ne'ebé nasaun enfrenta. Ami enkoraja Governu atu halo ezersísiu fundamentál ida hodi poupa no rezerva rekursu finanseiru uitoan ne'ebé iha, investe ba setór produtivu ne'ebé sustentavel no rekursu umanu sira.


FONGTIL nian observaun husi audit sosiál no programa sira seluk, deskobre katak situasaun sósiu ekonómiku no realidade povu nian moris kontinua enfrenta dezafiu barak inklui menus ai han, menus bee, dezempregu, mal nutrisaun no kualidade servisu públiku sira kontinua fraku tebes. Ami enkoraja atu Governu dezeña planeamentu ida ne'ebé bele lori solusaun loloos ba povu nian problema.

Iha semináriu Jornada Orsamentál ne'e mós hatudu, Kampu Bayu Undan ne'ebé fornese reseita barak liu ba Fundu Petrolíferu kuaze hotu ona. Husi ne'e ba oin, TL depende de'it ba kapitál no

retornu husi investimentu Fundu Petrolíferu. Nune'e, kapitál husi fundu petrolíferu depende ba situasaun merkadu internasionál no levantamentu ba fundu petrolíferu. Nune'e, ami sujere atu Governu bele dezeńia planeamentu polítika orsamentál ne'ebé apropriadu atu uza fundu petrolíferu nu'udar oportunidade atu harii kapasidade ekonomia doméstiku hodi sustenta Nasaun ba tempu naruk.

Bazeia ba ita-nia produsaun mina no gas la iha ona, ita-nia reseita mós tun ba \$20 milloens iha trimestre primeiru iha 2024. Fundu Petrolíferu hela de'it ona \$18.45 billoens, ita kalkula karik bele uza to'o tinan 2034, ita-nia Fundu Petrolíferu la iha ona, oinsá ho OJE kada tinan ba ita-nia futuru nasaun.

OJE ba tinan 2025, Ministériu Finansa apresenta senáriu rua entre biliaun \$1.8 no biliaun \$1.9, maski senáriu sira ne'e sei muda no iha tendénsia ba aumenta, haree ba jornada istóriu sira, ministériu prevee Fundu Petrolíferu sei hotu durante tinan 12 tuir mai depende ba fatór merkadu internasionál no nivel levantamentu FP ba OGE kada tinan.



Tanba ne'e FONGTIL ho nia membru ONG sira hakarak hato'o rekomendasaun sira hanesan tuir mai ne'e :

- Husu ba IX Governu Konstituisional atu hamenus despeza desnesáriu sira iha OJE 2024 no dezeńia polítika orsamentál ne'ebé apropriadu no ezekuta orsamentu estadu tinan 2025 ho kuidadu, fó importánsia ba setór produtivu sira hodi sai alternativu ba fundu petrolíferu no oferese solusaun ba problema estrutural ne'ebé iha.
- Husu ba Primeiru Ministru, SE. Sr. Kayrala Xanana Gusmão, hanesan Xefe do Governo atu kontrolu másimu ba ministériu sira ne'ebé jere OJE la ho kuidadu no la disiplina bazeia ba polítika jestaun OJE.
- Husu ba IX Governu atu tau importánsia no investe tan ba setór produtivu sira ho Porsentu 5 - 10 kada setór ne'ebé bele asegura solusaun loloos ba futuru naruk Timor-Leste nian hanesan investe ba setór agrikultura adapta ba teknolojia, turizmu (Komunitária, Relijiozu, Rezisténsia no Kulturál), kooperativa, indústria, peska, hodi nune'e hasa'e ita-nia produsaun rai laran, iha Oportunidade kampu servisu no hametin ita-nia ekonomia rai laran, no hamenus dependénsia ba importasaun.
- Ami apoiu Primeiru Ministru (PM) nia intervensaun iha soru mutu Jornada Orsamentál 2025, iha dia 05 Jullu 2024, ne'ebé husu atu halo redusaun ba alokasaun ba Saláriu no

Vensimentu, no racionaliza hodi utiliza Orsamentu iha kategoria sira ho apropriadu ne'ebé konsentra ba rezultadu sustentavel.

5. Ami apoiu deklarasaun Primeiru Ministru IX Governu Konstituisional iha soru mutu jornada orsamentu 2025 nian, ne'ebé atu reeve estatutu Instituisaun EP no IP sira, nune'e la bele hatodan Despeza Estadu liuliu ba Saláriu no Vensimentu.
6. Iha Jornada Orsamentál mós hatudu situaun ida ne'ebé presiza iha ezersísiu importante ida hodi redús despeza desnesesáriu sira iha lista Governu nian, nu'udar ezemplu ami haree iha kategoria saláriu no vensimentu atu selu funsionáriu públiku sira husi fulan Jullu to'o Dezembru 2024, presiza orsamentu USD 5.1 milloens, ho nune'e ami husu atu redús orsamentu ba asesór nia saláriu, redús asesór iha ministériu no parlamentu nasional, redús funsionáriu ne'ebé ho nia pozisaun la klaru no la importante.
7. Ami husu governu atu reeve alokasaun orsamentu ba kategoria bens no servisu ne'ebé la iha urjénsia maka hanesan redús viajen ba estranjeiru ho objetivu no agenda ne'ebé la klaru, redús kustu serimoniál no transferénsia públiku sira ne'ebé la importante.
8. Husu ba Prezidente da Repúblika no Parlamentu Nasional atu halakon tiha Dekretu Lei ne'ebé prevee ba subsídiu no kustu ba pensaun sira ne'ebé kontribui ba despeza desnesesáriu.
9. Husu ba IX Governu Konstituisional atu aseguira no sistemátiza implementasaun pilotu desentralizasaun atu nune'e desenvolvimento la bele sentraliza de'it iha kapitál Dili.
10. Husu atu investe ba rekursu umanu hodi desenvolve polítika governu nian ba diversifikasaun ekonómiku ne'ebé produtivu, reziliente no sustentavel.
11. Presiza adapta planu polítika mitigasaun ba risku husi fatór esterna sira hanesan mudansa klimatika, ne'ebé sei fó impaktu ba ita-nia planu desenvolvimento.
12. Husu ba IX Governu Konstituisional atu prioritiza no aselera programa revizaun ba planu estratéjiku desenvolvimento ne'ebé prevee programa governu ba tinan 5 hodi permite elaborasaun polítika ne'ebé realistíku no apropriadu.
13. Ami enkoraia Governu atu kontinua envolve iha prosesu elaborasaun polítika públiku inklui partisipa iha planeamentu annual iha nivel ministériu to'o Parlamentu Nasional.

Mak ne'e de'it, ba atensaun no konsiderasaun la haluha hato'o obrigadu barak.

**Dili, 18 Jullu 2024**

**Ami Nia Respeitu**



**(Valentim Da Costa Pinto)**  
**Diretór Ezekutivu FONGTIL**